

lis Gnovis

■ LISTIZE. Rassegne teatrâl comunâl



Ultims doi apontaments par fâ cuatri ridadis cul teatri amatoriâl te suaze de "Rassegne teatrâl comunâl", inmaneade dal Comun di Listize. Sabide ai 30 di Mai, aes 8.45 sore sere, tal Auditorium, al è in calendari il spettacul "Però mi vûl ben" cu la Compagnie teatrâl "I Vanzidui" di Sante Marie di Sclaunic (te foto). Il grup al tornarà a proponi il spettacul ançe domenie ai 31 di Mai, tacant aes 5 dal dopomisdì. La jentrade e je libere. La Amministrazion comunâl e à decidût, adun cu lis compagnis teatrâls dal Comun di Listize, che lis ufiertis metudis inte cassele tal ingrés dal teatri a coventaran pe organizazion de rassegne e par insiorà lis dotazions dal Auditorium.

■ PALAÇÛL. E rive la rassegne "Correnti di Cultura"



Joibe ai 28 di Mai aes 8.30 sore sere, li de Sale Conferencis dal Centri civic polifunzionâl "A. Biasutti" in vie Nazionale 37, al sarà presint Gianluca Doremi, che al compagnarà la int presinte tal cûr invisibil dal flum Stele (te foto): traviers di un viac inmagant ae scuvierte de vite che e cor sot de superficie. La iniziative e fâs part dal progjet difondût "Correnti di cultura", che al mude il cors di aghe intune conte dividude traviers di incuintris, lengaçs artistics e divulgazion culturâl, promovût dal Istitut Ladin Furlan "Pre Checo Placerean", cul contribût de Region, il patrocini, il contribût e la colaborazion dai Comuns di Bertiûl, Palaçûl, Pucinie, Rivignan Teôr e Talmassons, e il patrocini di Arlef-Agjenzie Regionâl pe Lenghe Furlane. L'event al è a jentrade libere e sore nuie.

■ CODROIPI. La Pallacanestro Codroipese e finis 70 agns

Domenie ai 31 di Mai, li dal Palaç dal Sport "Hank Biasatti" di Codroip, e sarà inmaneade une fieste in ocasion dai 70 agns de Asd Pallacanestro Codroipese, societât nassude dal entusiasim di grups di fantats che si alenavin sul asfalt daûr dal Domo di Codroip. Une realtât che e à acompagnât vie pal timp centenârs di zovins e fameis, metint in pîts une storie fate di impegn, risultâts sportifs e valôrs condividûts. Ore presint la societât e cjape part a 12 campionâts di federazion: 5 di minibasket (par frutins dai 5 ai 11 agns); 5 di fantats (dai 12 ai 19 agns) e 2 senior (un in prime e chel altri in tierce division regionâl). E cjape dentri plui di 200 atletis (95 dai 4 ai 11 agns, 75 dai 12 ai 19 agns, 40 cun plui di 20 agns) e e invistis in maniere continuade in formazion, imprescj (materiâi e machinaris) e progetualitâts educativis, promovint il sport tant che strument di cressite, inclusion e comunitât.

Miercus 27 S. Agostin di Canterbury

Joibe 28 S. Emili

Vinars 29 S. Massim di Treviri

Sabide 30 S. ts Canzians di Aquilee

Domenie 31

Lunis 1 S. Justin

Martars 2 S. ts Marcelin e Pieri

Il timp Al rive il cjaldon.

Ss. Trinitât



Il soreli

Ai 27 al jeve aes 5.23 e al va a mont aes 20.46.



La lune

Ai 31 Lune plene.

Il proverbi

Ogni fadie e merte un premi.

Lis voris dal mès

Lis plantis dal nestri ort nus regalìn simpri plui verduris sauridis: e je ore di ciapà sù cesarons, salatis, rucule, ai, ravanei, cicoriis.

444mil personis e fevelin furlan in maniere ative

Tal sît de ARLeF, te sezion "Materiâi", e je a disposizion "Furlan Contât", la publicazion che e da dongje i risultâts de ricercje sociolinguistiche "Tire fûr la lenghe", realizade par capî e analizâ l'ûs de lenghe furlane e di chês altris lenghis feveladis in Friûl. La indagjin e je stade fate tal 2023 di Ires Fvg in colaborazion cul Fef (Forskningssentrum för Europeisk Flerspråkighet) e un comitat scientific constituît di linguiscj des universitâts di Bolzan, Milan, Pavie, Trent e Vigo (Galizie). Dopo vè mandât fûr une selezion di dàts che i ricercjadôrs a àn otignût cuntune prime fase di elaborazion e analisi, il volum, che al è stât editât par cure de Ires Fvg in colaborazion cu la Agjenzie, al met a disposizion de comunitât scientifiche, des istituzions e dai citadins un cuadri analitic detaiât dai risultâts de ricercje.

La ricercje, sostignude de Region, e je stade realizade cul contribût de ARLeF inte suaze dal Plan gjenêral di politiche linguistiche pe lenghe furlane 2021-2025. Il studi si è fondât su passe 4.300 intervistis cjapadis sù in 178 Comuns dal Friûl-V.J. e dal Venit orientâl midiant di un cuisionari di uns cent domandis, par plui a rispueste sierade. Anche il contribût di 74 Istitûts Comprensifs al è stât fundamentâl: graciis al supuart dai insegnants, di fat, a àn permetût che la indagjin e rivàs intes fameis e che la raprezentazion de popolazion par etât e gjenar e fos largje e trasversâl.

Intal volum a vegnin presentâts la metodologie doprade dai ricercjadôrs e i risultâts de grande quantitât di dàts analizâts, cul supuart di taulis cartografichis e tabelis, dividudis daûr dai cjapitui: Famee, Comunitât, Competencis, Media, Ideologjie e Identitât.

I dàts principâi de ricercje in struc

La ricercje e conferme la vitalitât de lenghe furlane: lis personis che le fevelin in maniere ative a son cirche 444.000, plui de metât de popolazion dai teritoris



"Furlan Contât", ricercje sul ûs de lenghe furlane di Ires Fvg e Arlef in 178 comuns in F-VJ e Venit orientâl

indagâts. Il numar al rive a cirche 700.000 tignint cont anche di cui che le capis.

Lenghe ancjemò presinte intes fameis

Il furlan al continue a vè un rûl impuartant te trasmission familiâr: il 51% dai intervistâts lu declare tant che lenghe fevelade dai gjenitôrs, il 44%, invezeit, lu dopre cu la mari e cul pari.

Plurilinguism percepît tant che valôr

Il 79% dai intervistâts al calcole che cressi intun contest plurilingâl al rapresenti un vantaç e no che al impedissi l'aprendiment scolastic.

La domande di furlan a scuele e cres

Cuasi il 70% dal campion al declare di jessi a pro di une presince plui significative dal furlan tes scuelis; anche tal Venit orientâl (59%) chest valôr al reste alt.

Fuarte identitât culturâl

Il sens di apartignince furlane al ven fûr a fuart: il 52% dai intervistâts si sint "une

vore" furlan, percentuâl che e rive al 75% cjapant dentri anche di cui che si definis "avonde" furlan.

Plui supuart aes politichis linguistichis

Il 77% dal campion al è a favôr dal doprâ risorsis publichis par sostignî la lenghe furlane. Il valôr adeguât pai intervistâts al corispuint a 22 euros parom par an.

Furlan simpri plui presint tal digjitâl

La lenghe e je presinte soreddut inte comunicazion online e intes aplicazions di messazistiche: une persone su cuatri e dopre il furlan intai messaçs vocâi.

Al cres il ricognossiment inte amministrazion publiche

Anche se il furlan intai uficis publicis al ven doprât inmò in maniere limitade, il 42% dai intervistâts al volarès viodi la lenghe plui presinte anche intai rapuarts cu la amministrazion publiche: al è un segnâl che la legitimazion dal furlan in contescj istituzionài e formâi e je daûr a cressi.

Pagine par cure di **Monika Pascolo**

Peraulis in dismentie par cure di Mario Martinis

> GOLAINÈ

s.f. = collana; (in senso scherzoso) qualunque ornamento o fascia attorno al collo; collare degli animali domestici; catenella per legare i buoi al giogo (adattamento dell'italiano collana)

Ce golaine ti sèstu metude sù?
Che collana ti sei messa addosso?

> GOLARINE

s.f. = cravatta, fascetta da collo (adattamento dell'italiano collarina 'tela bianca inamidata del vestito sacerdotale')

Al à metût une golarine cussì colorade che ducj lu cjalin.
Ha indossato una cravatta così colorata che tutti lo guardano.

> GORNE

s.f. = doccia delle grondaie, di legno, di molini o simili (dal greco gura "mastello, vasca di pietra", dall'antico greco grône "cavità")

O vin di cambiâ il canon de gorne.
Dobbiamo cambiare il tubo di scarico della grondaia.

> GOSE

s.f. = gozzo; rigonfiatura del grano quando sta per nascere (dal latino parlato gurgutia, da gurges "gola, gorgo")

Cuant che al cjante, al canarin i ven la gose.
Quando canta, al canarino gli viene il gozzo.
I gjambers no son bogns fin che il forment nol va in gose.
I gamberi non sono buoni finché il frumento non ha le rigonfiature

> GRADINCE

s.f. = gradimento; stima, fiducia (dal latino gratus "grato, gradito")

Eme e merete dute la nestre gradince.
Emma merita tutta la nostra fiducia.

> GRAM

agg. = misero, triste, infelice, dolente (dal germanico gram "indolente")

La Cuaresime e je un timp lunc e gram.
La Cuaresima è un tempo lungo e dolente.